

**LJEKARSKA/LIJEČNIČKA KOMORA
FEDERACIJE BOSNE I HERCEGOVINE**

**PRAVILNIK O RADU KOMISIJA
LJEKARSKE/LIJEČNIČKE KOMORE FBiH**

Tuzla, oktobar 2021. godine

Na osnovu člana 23. stav 1. alineja 6., a u vezi sa članom 45. Statuta Ljekarske/Liječničke komore F BiH, Izvršni odbor Ljekarske/Liječničke komore F BiH na sjednici održanoj dana 2021. godine donio je

**PRAVILNIK
O RADU KOMISIJA
LJEKARSKE/LIJEČNIČKE KOMORE FBiH**

I OPĆE ODREDBE

Član 1.

Ovim Pravilnikom uređuju se pitanja od značaja za rad Komisija Ljekarske/Liječničke komore F BiH: nadležnosti, djelokrug rada, imenovanje, način rada, sazivanje, odlučivanje, kao i vrijeme (mandat) na koje se imenuje komisija.

Član 2.

Po ovom Pravilniku dužne su postupati sve Komisije Ljekarske/Liječničke komore F BiH, bilo da je riječ o stalnim Komisijama, ili onima koje Izvršni odbor imenuje privremeno.

II KOMISIJE

Član 3.

Stalne Komisije Ljekarske/Liječničke komore F BiH su:

- Komisija za medicinsku etiku i deontologiju
- Komisija za koordinaciju edukacije
- Komisija za registar
- Komisija za međunarodnu saradnju
- Komisija za privatnu praksu
- Komisija za lijekove
- Komisija za postupak verifikacije i certifikacije zdravstvenih ustanova i zdravstvenih radnika

Član 4.

Izvršni odbor imenuje i razrješava predsjednika i zamjenika predsjednika te članove stalnih Komisija na osnovu pristiglih prijedloga iz kantonalnih/županijskih komora.

Uz dostavljeni prijedlog svakog kandidata obavezno se dostavlja i njegova kraća biografija.

Član 5.

Izvršni odbor imenuje i razrješava predsjednika i zamjenika predsjednika te članove privremenih komisija.

Odlukom o imenovanju privremenih komisija Izvršni odbor utvrđuje sastav i djelokrug rada, mandat komisije, ciljevi i zadaci koji se aktivnostima Komisije trebaju postići, rokove za provođenje aktivnosti te dostavljanje izvještaja o radu Komisije.

II – 1. KOMISIJA ZA MEDICINSKU ETIKU I DEONTOLOGIJU

Član 6.

Komisija za medicinsku etiku i deontologiju (Komisija) obavlja slijedeće poslove:

- oblikuje Kodeks medicinske etike i deontologije;
- prati i nadzire provođenje pravila medicinske etike i deontologije, te poduzima odgovarajuće mjere u slučaju njihova kršenja;
- pruža zaštitu građanima u ostvarivanju prava s obzirom na kvalitet, sadržaj i vrstu zdravstvene usluge koja im se pruža;
- koordinira odnose među članovima te aktivno sudjeluje u rješavanju nastalih sporova;
- raspravlja i daje mišljenja, odnosno tumačenja o pojedinim pitanjima iz medicinske etike i deontologije;
- svoj rad koordinira sa ostalim organima Komore;
- obavlja i druge poslove određene Statutom ili aktima Komore.

Član 7.

Komisija za medicinsku etiku i deontologiju broji sedam članova, po jednog predstavnika iz svake kantonalne/županijske komore.

Izvršni odbor, imenuje predsjednika i zamjenika predsjednika te pet članova Komisije.

Komisija se sastaje najmanje dva puta u toku godine.

Većinom glasova, članovi Komisije, iz djelokruga svoga rada, usvajaju inicijative koje dostavljaju Izvršnom odboru Komore.

Izvršni odbor razmatra dostavljene inicijative te donosi odluke o daljem postupku.

II – 2. KOMISIJA ZA KOORDINACIJU EDUKACIJE

Član 8.

Komisija za koordinaciju edukacije obavlja slijedeće poslove:

- organizuje u saradnji sa medicinskim fakultetima te stručno-medicinskim društvima dodatno usavršavanje za proširenje djelatnosti unutar struke, uzimajući u obzir nove dijagnostičko-terapijske metode i trajno obrazovanje svojih članova;
- prati način obavljanja pripravničkog i specijalističkog staža ljekara, kao i njihovo permanentno stručno usavršavanje, te predlaže mјere za njihovo unapređenje;
- propisuje uvjete stručnog usavršavanja ljekara i koordinira stručno usavršavanje članova Komore / sudjelovanje na kursevima za obnavljanje znanja, sudjelovanje na stručnim i naučnim sastancima, kongresima i simpozijima, objavljivanje stručnih i naučnih radova i sl.;
- predlaže način obavljanja stručnih ispita ljekara;
- koordinira svoj rad s ostalim organima Komore;
- kontinuirano prati usklađenost Pravilnika o zajedničkim kriterijima i postupcima stručnog usavršavanja ljekara/lječnika u F BiH sa zemljama u okruženju te predlaže izmjene;
- obavlja i druge poslove određene Statutom ili aktima Komore.

Član 9.

Komisija za koordinaciju edukacije broji sedam članova, po jednog predstavnika iz svake kantonalne/županijske komore.

Izvršni odbor, imenuje predsjednika i zamjenika predsjednika te pet članova Komisije.

Komisija se sastaje najmanje dva puta u toku godine.

Većinom glasova, članovi Komisije, iz djelokruga svoga rada, usvajaju inicijative koje dostavljaju Izvršnom odboru Komore.

Izvršni odbor razmatra dostavljene inicijative te donosi odluke o daljem postupku.

II – 3. KOMISIJA ZA REGISTAR

Član 10.

Komisija za registar obavlja sljedeće poslove:

- vodi brigu i nadzor o obimu i kvalitetu stručnog djelovanja;
- te o drugim stručnim pitanjima u skladu sa Zakonom o zdravstvenoj zaštiti;
- daje saglasnost predsjedniku Ljekarske/Liječničke komore F BiH u postupku licenciranja ljekara, na način opisan Pravilnikom Komore;
- obavlja i druge poslove određene Statutom ili aktima Komore.

Član 11.

Komisija za registar broji sedam članova.

Izvršni odbor, imenuje predsjednika i zamjenika predsjednika te pet članova Komisije.

U postupku davanja saglasnosti po zahtjevu za licenciranje, Komisija postupa prema odredbama Pravilnika o utvrđivanju zajedničkih kriterija za licenciranje članova Ljekarske/Liječničke komore F BiH i članova kantonalnih/županijskih ljekarskih/lječničkih komora.

Većinom glasova, članovi Komisije, iz djelokruga svoga rada, usvajaju inicijative koje dostavljaju Izvršnom odboru Komore.

Izvršni odbor razmatra dostavljene inicijative te donosi odluke o daljem postupku.

II- 4. KOMISIJA ZA MEĐUNARODNU SARADNJU

Član 12.

Komisija za međunarodnu saradnju obavlja sljedeće poslove:

- kontinuirano radi na uspostavljanju međunarodne saradnje sa ljekarskim/lječničkim komorama drugih država, istovjetnim i/ili sličnim udruženjima, centrima za kontrolu bolesti (CDC, ECDC i dr.), sa pojedinačnim eminentnim stručnjacima iz oblasti medicine, medicinskim časopisima, raznim zdravstvenim asocijacijama, zdravstvenim strukovnim udruženjima, organima uprave i inspekcije, organima zakonodavne i izvršne vlasti, nevladinim organizacijama, farmaceutskim tvrtkama, proizvođačima medicinske opreme i sa drugim pravnim osobama kao potencijalnim donatorima Komori;
- vođenje registra u elektroničkom i pisanim obliku o uspostavljenim kontaktima Komore na međunarodnoj razini;
- učešće predstavnika Komore na međunarodnim skupovima u domenu rada Komore; uspostavljanje međunarodne saradnje sa ciljem omogućavanja članovima Komore edukacije u inozemstvu kroz stimulaciju i/ili donaciju Komori;
- uspostavljanje međunarodne saradnje sa ciljem mogućnosti aplikacije radova članova Komore u međunarodnim medicinskim časopisima;
- uspostavljanje međunarodne saradnje sa ciljem privremene razmjene stručnjaka iz različitih oblasti medicine;
- uspostavljanje međunarodne saradnje sa ciljem pomoći stručnjaka iz BiH iz različitih oblasti medicine liječničkim/ljekarskim komorama i zdravstvenim ustanovama drugih država kako u redovitim tako i u izvanrednim stanjima u tim državama;
- uspostavljanje međunarodne saradnje sa ciljem usvajanja i implementacije zakonske regulative iz oblasti međunarodnih zdravstvenih propisa (IHR-International Health Regulations)

- obavlja i druge poslove određene Statutom i drugim aktima Komore.

Član 13.

Komisija za međunarodnu saradnju broji sedam članova.

Izvršni odbor, imenuje predsjednika i zamjenika predsjednika te pet članova Komisije.

Prilikom imenovanja članova Komisije, vodit će se računa da isti raspolažu vještinama poznavanja stranih jezika.

Komisija se sastaje najmanje dva puta u toku godine.

Većinom glasova, članovi Komisije, iz djelokruga svoga rada, usvajaju inicijative koje dostavljaju Izvršnom odboru Komore.

Izvršni odbor razmatra dostavljene inicijative te donosi odluke o daljem postupku.

II – 5. KOMISIJA ZA PRIVATNU PRAKSU

Član 14.

Komisija obavlja sljedeće poslove:

- daje stručnu pomoć privatnim zdravstvenim radnicima u svim pitanjima koja su od značaja za obavljanje privatne prakse;
- daje stručnu pomoć prilikom izrade pravilnika o formiranju cijena zdravstvenih usluga;
- utvrđuje zajedničke smjernice i normative koji su odlučujući za formiranje cijena zdravstvenih usluga u privatnoj praksi;
- zastupa interese svojih članova, koji obavljaju privatnu praksu, kod državnih organa i drugih institucija;
- obavlja i druge poslove određene Statutom i drugim aktima Komore.

Član 15.

Komisija za privatnu praksu broji sedam članova.

Izvršni odbor, imenuje predsjednika i zamjenika predsjednika te pet članova Komisije.

Komisija se sastaje najmanje dva puta u toku godine.

Većinom glasova, članovi Komisije, iz djelokruga svoga rada, usvajaju inicijative koje dostavljaju Izvršnom odboru Komore.

Izvršni odbor razmatra dostavljene inicijative te donosi odluke o daljem postupku.

II – 6. KOMISIJA ZA LIJEKOVE

Član 16.

Komisija za lijekove obavlja sljedeće poslove:

- promovira individualni i institucionalni integritet ljekarske profesije u farmakoterapijskom sektoru;
- predlaže i usklađuje domaće zakonske propise iz oblasti lijekova sa propisima Evropske unije i rezolucijama, smjernicama, deklaracijama i stavovima relevantnih međunarodnih institucija/organizacija;
- striktno i dosljedno prati, provodi i unapređuje visoke profesionalne standarde, dosljedno sprovodi važeće međunarodne etičke norme, deklaracije i izjave iz domena rada Komisije, isključivo na dobrobit pacijenta i časne ljekarske/lječničke profesije;
- razmatra, predlaže i daje mišljenje Federalnom ministru zdravstva o listi lijekova i terapijskim smjernicama na osnovu medicine zasnovane na dokazima, te u skladu sa savremenim smjernicama relevantnih domaćih, međunarodnih i evropskih strukovnih udruženja, a uvijek imajući u vidu farmakoterapijsku i farmakoekonomsku opravdanost i dobrobit za pacijenta;

- predlaže, razmatra, sugeriše i daje mišljenje Federalnom ministru zdravstva o izmjenama i dopunama liste lijekova;
- razmatra izvještaje Zavoda zdravstvenog osiguranja o potrošnji lijekova i predlaže odgovarajuće mjere;
- prati potrošnju lijekova i medicinskih sredstava i predlaže mjere za racionalnu upotrebu;
- usko sarađuje sa svim relevantnim subjektima, a posebno Agencijom za lijekove i medicinska sredstva BiH, ministarstvima zdravstva (Federalnim i Kantonalnim/Županijskim), zavodima zdravstvenog osiguranja (Federalnim i Kantonalnim/Županijskim), te drugim vladinim organizacijama i ustanovama, kao i drugim strukovnim udruženjima, komorama i komisijama u zajedničkom ostvarenju zacrtanih ciljeva Komisije;
- daje stručna mišljenja kod pripreme propisa koji su od uticaja na razvoj zdravstvene struke, organizira dodatno usavršavanje za proširenje djelatnosti unutar struke, s obzirom na nove dijagnostičko-terapijske metode;
- obavlja i druge poslove određene Statutom ili aktima Komore.

Član 17.

Komisija za lijekove broji sedam članova, po jednog predstavnika iz svake kantonalne/županijske komore.

Izvršni odbor, imenuje predsjednika i zamjenika predsjednika te pet članova Komisije.

Komisija se sastaje najmanje dva puta u toku godine.

Većinom glasova, članovi Komisije, iz djelokruga svoga rada, usvajaju inicijative koje dostavljaju Izvršnom odboru Komore.

Izvršni odbor razmatra dostavljene inicijative te donosi odluke o daljem postupku.

II – 7. KOMISIJA ZA POSTUPAK VERIFIKACIJE I CERTIFIKACIJE ZDRAVSTVENIH USTANOVA I ZDRAVSTVENIH RADNIKA

Član 18.

Komisija za postupak verifikacije i certifikacije zdravstvenih ustanova i zdravstvenih radnika, obavlja slijedeće poslove:

- daje mišljenje u postupku dodjele naziva referalni centar zdravstvenoj ili dijelu ustanove;
- daje mišljenje o opravdanosti osnivanja, proširenja ili promjene zdravstvene djelatnosti u zdravstvenoj ustanovi koja obavlja tercijarni nivo zdravstvene zaštite i za čije donošenje rješenja o ispunjenosti uslova je nadležan federalni ministar, odnosno mišljenje o opravdanosti osnivanja, proširenja ili promjene univerzitetsko-kliničke bolnice i federalnog zavoda, i to sa aspekta zaštite i očuvanja profesije doktor medicine;
- prema utvrđenom načinu i uslovima za upravljanje novim zdravstvenim tehnologijama ove Komore, certificuje zdravstvene radnike za upravljanje istim;
- obavlja i druge poslove određene Statutom i drugim aktima Komore.

Član 19.

Komisija za postupak verifikacije i certifikacije zdravstvenih ustanova i zdravstvenih radnika broji dva člana, jedan zaposlenik Kliničkog centra Univerziteta u Sarajevu i jedan zaposlenik Univerzitetsko kliničkog centra u Tuzli.

Izvršni odbor, imenuje predsjednika i zamjenika predsjednika iz reda kandidata koje delegiraju Ljekarska komora Tuzlanskog kantona i Ljekarska komora Sarajevskog kantona.

Komisija svoje aktivnosti provodi u skladu sa Poslovnikom o radu.

III RAD KOMISIJA

Član 20.

Predsjedavajući saziva sjednicu komisije u svrhu razmatranja i donošenja odluka po zahtjevu stranke, ili u svrhu realizacije planiranih aktivnosti.

Član 21.

Ukoliko se postupak pokreće po zahtjevu stranke, sekretar LJ/LK F BiH odmah, a najkasnije u roku od osam dana od dana prijema zahtjeva o predmetu obavještava predsjedavajućeg komisije. Predsjedavajući komisije je dužan najkasnije u roku od 30 dana sazvati sjednicu komisije, a sekretar dostavlja poziv uz materijal i ostalim članovima komisije.

Član 22.

Komisije, čiji rad nije iniciran postupkom po zahtjevu stranke, dužne su održati najmanje jednu radnu sjednicu u toku izvještajne godine.

Radnu ili tematsku sjednicu mogu sazvati sve komisije.

Komisiju saziva predsjedavajući ukoliko postoji potreba za razmatranjem određene problematike, pitanja od važnosti za ljekarsku struku ili razmatranja aktivnosti iz djelokruga rada komisije.

Član 23.

Komisija će održati sjednicu kada u radu iste učestvuje nadpolovična većina svih članova komisije, odnosno kada ima kvorum (50%+1).

Član 24.

Komisija donosi odluke nadpolovičnom većinom glasova (50%+1) prisutnih članova sjednici koja ima kvorum.

Glasanje je javno.

Svaki član komisije treba da iznese svoj stav o pitanju koje komisija razmatra.

Član 25.

Sjednicama Komisije prisustvuje i sekretar LJ/LK F BiH, bez prava glasa, koji vrši administrativne poslove, priprema zapisnik sa sjednice komisije i izvještaj o radu, vodi dokumentaciju i druge poslove po zahtjevu predsjedavajućeg.

Član 26.

Nakon održane sjednice, sekretar je dužan izraditi odluku komisije i istu dostaviti stranci po čijem zahtjevu je pokrenut postupak pred komisijom LJ/LK F BiH.

Odluku komisije potpisuju predsjedavajući komisije i predsjednik LJ/LK F BiH.

IV ODLUKE KOMISIJA

Član 27.

Komisija može donijeti odluku kojom zahtjev stranke prihvata ili odbija, u cijelosti ili djelimično. Komisija je dužna svoju odluku obrazložiti.

Član 28.

Nezadovoljna odlukom komisije, stranka može izjaviti žalbu Izvršnom odboru LJ/LK F BiH.

Ukoliko komisija po zahtjevu stranke ne poduzme radnje, niti doneše odluku najkasnije u roku od 60 dana od dana dostavljanja zahtjeva stranke, stranka može izjaviti žalbu Izvršnom odboru.

Član 29.

O žalbi stranke odlučuje Izvršni odbor.

Izvršni odbor žalbu može odbaciti, odbiti ili istu usvojiti i donijeti konačnu odluku.

Žalbu će odbaciti ako je neblagovremena, nedopuštena ili izjavljena od neovlaštene osobe.

Izvršni odbor će žalbu odbiti kada je neosnovana.

Ukoliko Izvršni odbor utvrdi da su navodi žalbe osnovani, donijet će odluku kojom usvaja žalbu i sam rješava zahtjev stranke.

Odluka Izvršnog odbora je konačna, a stranka može pokrenuti upravni spor.

V POSEBNI POSTUPCI KOMISIJA

1.) POSTUPAK U SLUČAJU ZAHTJEVA ZA MIŠLJENJE ZDRAVSTVENE USTANOVE ZA DODJELU NAZIVA REFERALNI CENTAR

Član 30.

Zahtjev za pozitivno mišljenje LJ/LK F BiH za dodjelu naziva referalni centar zdravstvena ustanova dostavlja na adresu LJ/LK F BiH i isti mora da sadrži:

- Oznaku da se radi o zahtjevu za pozitivno mišljenje LJ/LK F BiH za dodjelu naziva referalni centar;
- Naziv zdravstvene djelatnosti ili dijela zdravstvene djelatnosti u dijagnostici, terapiji, liječenju, prevenciji i rehabilitaciji bolesti, odnosno grupa bolesti za koju će zdravstvena ustanova tražiti dodjelu naziva referalni centar;
- Spisak stručnog kadra koji mora da ispunjava slijedeće uslove:
 - 1) Da posjeduje urednu ličnu dokumentaciju predviđenu za ljekare/lječnike;
 - 2) Da su u stalnom radnom odnosu u zdravstvenoj ustanovi ili dijelu zdravstvene ustanove koja podnosi zahtjev za mišljenje o osnivanju referalnog centra;
 - 3) Da zdravstvena ustanova sa aspekta stručnog kadra ispunjava uslove predviđene Pravilnikom, i to:
 - najmanje pet ljekara sa naučnim zvanjima doktori medicinskih nauka, od toga tri u nastavnom zvanju redovnog profesora, vanrednog profesora i docenta u stalnom radnom odnosu u zdravstvenoj ustanovi ili dijelu zdravstvene ustanove koja podnosi zahtjev za mišljenje za referalni centar,
 - najmanje sedam ljekara u zvanju subspecialiste i specijaliste iz određene grane za koju se traži dodjela naziva referalni centar koji su u stalnom radnom odnosu u zdravstvenoj ustanovi ili dijelu zdravstvene ustanove koja podnosi zahtjev za dodjelu naziva referalni centar;
 - broj objavljenih naučnih radova u indeksiranim medicinskim časopisima (Current Contents, Medline i dr.) ljekara uposlenih u zdravstvenoj ustanovi, odnosno dijelu zdravstvene ustanove koja podnosi zahtjev za pozitivno mišljenje u svrhu dodjele naziva referalni centar, sa temama usko vezanim uz dijagnostiku i terapiju pojedinih bolesti, odnosno grupa bolesti, prevenciju i rehabilitaciju u određenoj grani za koju se traži dodjela naziva referalni centar (najmanje 10 radova, udžbenika, monografija i dr., od čega u posljednje dvije godine najmanje četiri rada).

Ukoliko zdravstvena ustanova ispunjava sve naprijed navedene uslove komisija LJ/LK F BiH će izdati pozitivno mišljenje, u rokovima i na način predviđen ovim Pravilnikom.

2.) POSTUPAK U SLUČAJU ZAHTJEVA ZA MIŠLJENJE ZA OSNIVANJE, PROŠIRENJE ILI PROMJENU ZDRAVSTVENE DJELATNOSTI U ZDRAVSTVENOJ USTANOVI IZ NADLEŽNOSTI FEDERALNOG MINISTARSTVA ZDRAVSTVA

Član 31.

LJ/LK F BiH daje mišljenje o opravdanosti osnivanja, proširenja ili promjene zdravstvene djelatnosti u zdravstvenoj ustanovi koja obavlja tercijarni nivo zdravstvene zaštite i za čije donošenje rješenja o ispunjenosti uslova je nadležan federalni ministar, odnosno mišljenje o opravdanosti osnivanja, proširenja ili promjene univerzitetsko-kliničke bolnice i federalnih zavoda, i to sa aspekta zaštite i očuvanja profesije doktora medicine.

Član 32.

Zahtjev za pozitivno mišljenje LJ/LK F BiH za osnivanje, proširenje ili promjenu zdravstvene djelatnosti u zdravstvenoj ustanovi za čije je osnivanje nadležno Federalno ministarstvo zdravstva, zdravstvena ustanova dostavlja na adresu LJ/LK F BiH i isti mora da sadrži:

- Oznaku da se radi o zahtjevu za pozitivno mišljenje LJ/LK F BiH za osnivanje, proširenje ili promjenu zdravstvene djelatnosti u zdravstvenoj ustanovi za čije osnivanje je nadležno Federalno ministarstvo zdravstva i čiji osnivač je Federacija BiH (univerzitetsko-klinička bolnica i federalni zavodi);
- Naziv zdravstvene djelatnosti koja će se obavljati u zdravstvenoj ustanovi;
- Spisak stručnog kadra koji mora da ispunjava slijedeće uslove:
 - 4) Da posjeduje urednu ličnu dokumentaciju predviđenu za ljekare/lječnike;
 - 5) Da su u stalnom radnom odnosu u zdravstvenoj ustanovi ili dijelu zdravstvene ustanove koja podnosi zahtjev za mišljenje;
 - 6) Da zdravstvena ustanova (UKC) sa aspekta stručnog kadra ispunjava uslove predviđene Pravilnikom, i to:
 - Za obavljanje djelatnosti UKC mora imati uposlen visoko kvalificiran stručni kadar u rangu specijalista, odnosno subspecijalista od kojih najmanje dva specijalista moraju imati nastavno zvanje redovnog profesora ili vanrednog profesora ili docenta na fakultetu za koji se bolnici dodjeljuje naziv univerzitetska.
 - 7) Da federalni zdravstveni zavodi, i to Zavod za javno zdravstvo F BiH i Zavod za transfuzijsku medicinu F BiH sa aspekta stručnog kadra ispunjava uslove predviđene za osnivanje, proširenje ili promjenu djelatnosti, i to ZZJZ F BiH ovisno o vrsti pojedinih djelatnosti, a ZZTM F BiH:
 - 15 doktora medicine, specijalista transfuzijske medicine;
 - jedan specijalista kontrole lijekova;
 - jedan specijalista medicinske biohemije;
 - četiri doktora medicine.

Ukoliko zdravstvena ustanova ispunjava sve naprijed navedene uslove komisija LJ/LK F BiH će izdati pozitivno mišljenje, u rokovima i na način predviđen ovim Pravilnikom.

3.) POSTUPAK U SLUČAJU ZAHTJEVA ZA CERTIFIKACIJU ZDRAVSTVENIH RADNIKA ZA UPRAVLJANJE NOVIM ZDRAVSTVENIM TEHNOLOGIJAMA

Član 33.

LJ/LK F BiH, po posebno utvrđenim kriterijima, može da izda certifikat ljekarima/lječnicima za upravljanje novim zdravstvenim tehnologijama.

Nove zdravstvene tehnologije podrazumijevaju zdravstvene tehnologije koje se po prvi put uvođe za korištenje u zdravstvenim ustanovama i privatnoj praksi u Federaciji Bosne i Hercegovine, odnosno za određene nivoje zdravstvene zaštite, kao i zdravstvene tehnologije koje po prvi put koristi određena zdravstvena ustanova, odnosno privatna praksa.

LJ/LK F BiH može izdati certifikat ljekaru/lječniku samo za one nove zdravstvene tehnologije iz oblasti medicine koje se primjenjuju i u drugim visoko razvijenim zemljama, čija je naučna prihvatljivost već potvrđena u medicinskoj praksi, kao i zdravstvene tehnologije koje se razvijaju u Bosni i Hercegovini i čija je naučna prihvatljivost potvrđena i u medicinskoj praksi u Bosni i Hercegovini, a mogu se primjenjivati u provođenju zdravstvene zaštite.

Član 34.

KRITERIJI ZA CERTIFIKACIJU

Uz zahtjev za certifikaciju LJ/LK F BiH ljekar/lječnik dostavlja slijedeću dokumentaciju:

1. Dokaz o obučenosti za obavljanje određene zdravstvene tehnologije;
2. Dokaz o procjeni zdravstvene tehnologije obavljene u drugim zemljama, u kojima je uvedena ova tehnologija, ili drugom referalnom centru u BiH;
3. Publicirani sistemski pregled o kliničkoj efektivnosti i sigurnosti (Cochrane baza podataka, DARE baza podataka ili sistemski pregledi ekonomskih analiza);
4. Pregled novih kliničkih studija sa provedenim ekonomskim evaluacijama;
5. Mišljenje udruženja ljekara/lječnika specijalnosti ili subspecijalnosti kojoj pripada ili koja je najbliža zdravstvenoj tehnologiji za koju se certificiranje traži.

(*Iz Pravilnika "Procjena zdravstvenih tehnologija je multidisciplinaran, stručan, nepristran, objektivan, temeljen na dokazima i transparentan proces procjene kliničke učinkovitosti i sigurnosti, uz ekonomsku analizu zdravstvenih tehnologija (prevencija, dijagnostika, liječenje i rehabilitacija) uzimajući u obzir etička, socijalna, pravna i organizacijska načela."*)

VI PRELAZNE I ZAVRŠNE ODREDBE

Član 35.

Kantonalne/županijske ljekarske/lječničke komore, su dužne, u roku od 30 dana od dana izbora i imenovanja rukovodećih tijela Komore dostaviti Izvršnom odboru Komore prijedlog za imenovanje članova Komisija kako bi se osiguralo nesmetano provođenje aktivnosti Komore.

Član 36.

Ovaj Pravilnik stupa na snagu danom donošenja od strane Izvršnog odbora Ljekarske/Lječničke komore F BiH.

Tumačenje odredabi ovog Pravilnika daje Izvršni odbor LJ/LK F BiH.

Ovaj Pravilnik je objavljen na web stranici Ljekarske/Lječničke komore F BiH [www.](#)

Tuzla, 2021. godine
Broj: /21

Predsjednik Izvršnog odbora
Dr Raho Spahović